


沈乃文主編

明別集叢刊 第四輯

第六十八冊

黃山書社





國家出版基金項目
NATIONAL PUBLICATION FOUNDATION


「十二五」國家重點圖書出版規劃項目
2011—2020年國家古籍整理出版規劃重點項目

沈乃文 主編

明別集叢刊 第四輯

第六十八冊

黃山書社



(明)董嗣成 撰

董禮部集六卷附尺牘二卷

民國十七年吳興劉氏嘉業堂刻本

董禮部
卯齋
尺牘
二齋

吳興劉氏
嘉業堂刊

董伯念詩序

吳興自沈隱侯爲四聲嚆矢附注之士代不乏明
獨寥寥嘉隆以來然後秋風翔暢逸才比肩湧出以余
所睹記蔡子木徐子與而下無如伯念者伯念燥髮時
卽蹀躞不羈其王父宗伯公方以計然之策起家擅素
封於江以南伯念弗善也獨折節讀書習爲古文詞既
成進士授祠部郎會上以建儲議格杖諫者廷臣惕息
伯念抗疏爭之前後數萬言疏再上不省坐削籍歸
則遷居山中不復與世接時余方至苕間屏騶從過之
野服相對命酒賦詩靡間也居無何董氏難作宗伯公
不愛重貲以與黔首購一二耽耽視者欲得而甘心焉

序

數矣卒以伯念故止是時微伯念事幾殆既廷議雅重
伯念欲強起之則伯念死矣伯念於書無所不讀至於
書畫篆籀皆窮其妙其詩古選憲章陶謝近體沐浴岑
王用物弘而鑪錘苦取態巧而意象具如藐姑射仙人
飲瀟殢風軒軒霞舉蓋自弇州太函相繼下世天假伯
念以年駸駸乎將立壇壝與海內爭雄長必不肯捐黃
河以北自作龜茲也烏乎金刀掩銳長淮絕澗在昔歎
之冥契旣逝發言莫賞余於伯念有餘慟矣伯念旣死
茅侍御荐卿兄弟念甥舅之好爲葺其遺稿行之而余
爲序之謝肇淛曰余初識伯念於長安道中蓋嘗一以
牛耳許之於茲十載矣伯念死而不及見其成則天也

夫天之於人富貴其所不惜其有洩靈秘而擅聲華者則真宰若默讐之以吾觀於宗伯公所謂富好行其德者也爵上卿能使奴自饒而食其力轉穀百數豈不洋洋大哉然造物不少靳也董董一伯念而遽奪之矣豈固有幸不幸耶抑蒼蒼者所重不在彼而在此耶夫伯念已矣吾將以俟諸不可知者陳留謝肇淛

序

董伯念傳

東海茅國縉薦卿甫撰

董伯念卒之日海內薦紳先生以及騷人俠客靡不咨嗟歎息抱云亡之痛或絮炙走數千里憑其棺哭之哀不留刺而去乃謀所爲不朽伯念者唯是遺文若干篇纍纍而在友人吳子野溫允文李白甫爲之搜羅校次會閩中謝在杭先生以名賢司理吾郡而吾里中賢豪如章元禮朱太復吳允兆皆亟爲之序斯亦足以覘伯念矣子野復把余臂太息曰諸公俱足不朽伯念願莫能明伯念所以伯念有心非吾子孰與慰九原述後世乎嗟乎余忍伯念哉爲飲泣而

傳

撫其遺作董伯念傳

董伯念者名嗣成伯念其字也先世居烏程之上林嘗手植梅蒼蔚扶疏蔭覆數席宋南渡乘輿嘗止蹕其下遂號梅林董於吳爲著姓焉入本朝大父宗伯公份以文章工麗受知世廟貴而寵父道醇官給諫母茅氏余父鹿門公次女以伯念貴封宜人有弟五人而同母弟嗣昭最才伯念生而癯黎黑兩目起煙霧望之如山澤人年二十明春秋薦鄉試高第明年成進士二甲第一人授祠部郎當是時伯念以少年才士直華省而宗伯公門生姻婭滿朝廷據津握樞世竟指目之顧伯念驚馬襮被蕭然長安邸中長安貴人忘其爲世家子也又

三年給諫公始成進士授行人奉使出國門閒道歸省而伯念亦齎璽書東歸會宗伯公躋大臺子若孫奉觴上壽賓客車馬馳逐如鶩家僮衣綺縠飾膏澤夾尻而趨烹鮮炙肥帑鞫臙妖冶都豔獻羞侍酒伐鐘鼓吹笙竽俳優侏儒之戲窮日夜伯念獨喟然曰嗟乎物禁太盛且以今所觀顧可久長計耶未幾給諫公病沒伯念自邸奔訃哭泣饘粥如不勝喪乃前請於宗伯公爲書數千言大都損益虧盈之旨而嗚咽悲憤語過激宗伯公不省宗伯公故以蒼頭力起家頗暱近之其臨子若孫則甚矜嚴蓋嘗面予伯念所請而諸蒼頭輒微言巧沮者數矣伯念亦輒嗚咽悲憤不敢復言服闋補主

傳

客邸席未及暖念身爲禮官首以建儲上請不報諸官繼爭之貶黜殆盡孟給事養浩最忤上意廷杖之幾絕是日天風霾白日黯黯朝士都相顧無人色京師誼言給事已斃伯念策馬歸邸適賓客滿座飲酒不盡厄起闔戶草疏詰旦實封以進始出其副本示同舍郎一日徧布長安中讀其疏者莫不心怖股栗而伯念意氣自如改服出舍待命左掖廡下草疏之夕舍中兒有微覺其事者抉戶涕泣以宗伯公老郎君幼爲請伯念獵襟大言曰今日之事吾倡言之首禍誼不使孟給事獨死我獨生且吾家三世食大官奈何愛七尺不爲明主一忠言決矣無可奪者於是舍中兒涕泣出市良藥或

治木以待微聞主上覽疏怒甚抵之地已復呼左右取覽曰嘻若果不畏死耶俄得旨削籍去舉朝譁且喜且愕當是時伯念亢直聲震動海內海內人士莫不延頸羨宗伯有孫給諫有子伯念著小冠短褐買蹇驢出長安歷滹沱邯鄲竟燕趙三齊之墟發爲詩歌多感慨悲思而無所懟怨識者益賢之居無何江以南一二世家與當路相齟齬引繩批根浸淫不可解於是閭里之悍逐利競起伯念歎曰固也向吾數言散吾家不吾省今事急而圖之縱不知者謂我我豈敢背吾心哉且食吾言哉乃大署其門曰悖入者返不讐者償署始布諸無賴惡少瞋目攘袂繞廬叫呼慮非顧曲直生平無短長

傳

或素所卵翼者咸操戈反噬東西吳爲之嚙然騷動宗伯公素以貴雄江南不數月存者十僅二三伯念既內失宗伯公心外爲無賴輩所窘急僇辱悒悒不得志始病嘗慷慨稱曰昔人言富不如貧貴不如賤第未知死何如生以吾念之生烏得與死並耶萬厯乙未嗣昭成進士伯念始輟然喜曰吾有弟而才且顯門戶可託獲我心矣遂出橐中金買別業於東林山之麓爲終焉計俄而宗伯公謝世嗣昭相繼歿伯念號哭屢絕歎曰始吾病特苦賸理今在骨髓已矣世有秦越人寧能起吾弟也而我望起乎余時從中州歸褰帷相對骨立癯癯可念欲哭不敢出聲然兩目炯炯猶觸人謂庶幾再起

乃百方療之卒無效竟以冬十月四日大呼而絕年三十六絕之頃覺赤光從頂中出亟呼宜人泣曰不孝子不能復奉母魂魄長恨矣吾死後白服裏吾尸以謝天子嗟乎痛哉伯念木強坦中絕無城府町畦意有不可惟慙額低首卽家庭間不能憤發侃侃乃其危言感激犯雷霆甘鼎鑊如飴抑何勇也其才華而敏書法憲章二王上下趙承旨繪事在雲林叔明之間片紙所落人爭寶之而恂恂不以傲睨人人亦未有以才忌之者當家難初發時念且澡濯家政以清白世其後竟敗壞不可收拾居嘗憤憤諸臧獲亦竟不能翦拂就羈屬遺其憂於老母弱子無異以羊將狼豈其所從來遠固不可

傳

四

旦夕冀耶抑尺短寸長彼固有能有不能耶子廷勛年九歲韶秀而穎其家且日落必能讀父書而以清白成先志者

茅薦卿曰余嘗覽伯念與友人書曰乞比丘以百部妙法懺悔愿世世無生朱門中余爲之憮然者久之以彼志節卓犖庶幾哉嶠然不滓也者而竟以重縉發難一敗不可收卒悵悵齎志而往況中才之士乎古者世其官魏晉而還以門選趙宋猶以任子起家取卿相聲稱後世者比比乃今公卿子茹荼食淡砥節行曾不得與白屋寒士伍何歟然伯念所苦心進退君親間自足不死而可以死爲伯念魂魄者又何費焉

董禮部集卷一

吳興叢書

明烏程董嗣成著

同邑後學劉承幹重編

五言古詩

清河夜泊

朝發淮陽城暮宿清河縣洪流激湍音高秋明素練南風一以吹歷歷雙蓬轉金氣慘且肅霜隕蔽蕤變我身飄如蓬我心愁以蔓仰觀明月光哀聞雁南翔月光千里同雁飛不成行沙磧半入河衰艸接天荒幾家窟穴中野燒多蒼茫身非苦征戍胡爲眷此鄉此鄉非吾故栖斷悲長路路長有盡時我心更誰知隨風發清商藉以寄所思

禮一

送包別駕南還

徂征一何迅眷言不長顧流序擾羈心炎風啟脩路僕夫憚午發客思安微暮薄虹飲晴川斜陽澹輕霧以予慕歸人懷彼山中寤揮袂離席遙孤雲寫情素素心遠從君托寄滄洲樹

贈別屠緯真儀部四首

冥冥大道沒稍稍世塵滋游覽寰中物托身將安之羸蜾視亦肖亡羊路何岐倬哉獨斯人崛起名世資矚目空八紘抗志千秋期區區方寸心相隨以驅馳

其二

高卧蓬邱中置酒日懽懽白眼都人士吐辭眾錯愕四

座寒雲飛遙空繁星落生平莽蒼意相看舉寥廓曜靈
任奔突青冥恣磅礴遐哉解醒者千載寧復作

其三

浮生安所寄飄蓬隨西風一轉難自覺吹墮汚淖中遺
珠大道俯昧者不復逢誰能滯塵土妙識懸解通組綬
不足繫兩腋生罡風長揖辭漢庭終當從赤松

其四

余結南遊軫君滯承明署笑語隔星河展轉牽岐路恥
生兒女心所嗟莫余助金石詎可銷廸德允難□巖穴
本夙契紛華何足慕何日凌虛空共踏丹霞去

集古送紀仲子應試

禮一

兔絲附女蘿結交亦相因堂上置尊酒歡樂難具陳結
志青雲上兄弟兩三人脩翼無卑栖逍遙撰良辰涼風
入我室肅肅僕夫征飛鳥在我前太清不受塵男兒重
意氣恨恨那可論贈子以自愛千載有雄名比翼翔雲
漢先據要路津

春日過康伯舅氏園林題贈

杖策涉春郊柔風來芳林飛虹亘長渚宏軒瞰遙岑以
彼疎曠客適我寥落心何必敬崇構眇懷多高深平原
趨楹前況有正中琴行歌選磐石脩焉蕩煩襟

其二

風有高逸尙營構屏塵慮衡門帶長薄清流蔭芳樹披

軒無垢氛惟有青霞護簾箔遞春聲睨曉流鶯度微風
振輕舸平川恣容與架多正索藏室有鼎彝富託彼軒
貴途馳心以榮慕

罨畫溪上作

曲曲山下溪亭亭山上松泛泛水中舸謾謾生長風蒼
林蔽白日大冶失其容浮陰翳以繁雲物蕩心胸俯景
同遊魚仰面接飛鴻安得結吾廬優游以長終

鼓枻出城隅峰巒窺堞起脩柯蒙蒼鱗垂篠蔭淥水良
朋偕契儔有酒多且旨跌坐藉芳蓀流觴雜澗沚幽禽
聲啾啾飛鳴墮人耳繁華有銷歇景物無窮已慨慷千
年中臨風懷帝子頽宮生荒煙荆榛蔽羅綺所以清遠

禮一

心永言托君子

舟行對月小飲

浩歌延暮景朗月來青旻團團當客窗離離照客心流
光初澹蕩灝氣益四沈擊甕取斗酒呼兒烹鮮鱗月影
入杯中爍煜生黃金自我日北來土風日以異獨有天
上月照我同兩地有月且徘徊有酒且沈醉天地如蘆
廬逆旅任所寄

詠懷詩有序

夫時多盈缺達人固以屈伸境有屯亨志士緣
之感慨然聲由情發興以言宣故水激而湍瀨
斯鳴弦急而宮商乃協蟬當夏噪蛩以秋吟謂

非出之自然而徵之時會者乎東阿遭斥乃上
責躬叔夜逮收用成幽憤梁鴻出關而賦五噫
應璩悲時而咏百一如茲之類良難數尋余丁
時不造家難嬰躬九原莫起深懷樹靜二毛早
見每歎河清觸序皆悲捫心增恨況值炎蒸良
難自遣爰於長日捉管成篇遂得十有四章

南山有喬木直幹凌青雲上有翔虬枝下有磐石根好
鳥巢其顛兔絲垂紛紜鳥鳴雖以啮綠葉稠且陰嚴冬
霜不凋豈謂愁斧斤狂狴動天地倏忽山石奔白日黯
欲墮重霾結氤氲悲哉千年固毀折同芻薪眾鳥驚覆
巢哀嗚呼其羣昔爲篋中錦今作車下塵內傷失所托

禮一

四

匪直求同林哀聲徹晨夕腸絕那可聞

矯矯雙黃鵠高飛太山顛舉足亂浮雲翅可摩青天饑
飡桂樹枝渴飲崑崙泉寧與樊籬鳥鼓翼相周旋一朝
鍛羽翮俛首受羈牽恥爲耳目玩常思凌雲煙奮飛會
有時寄言弋者前

士生千載閒知己固艱得楚國卞和氏抱玉甘自泣豈
不爲惜身所嗟重泯沒我有千金劍解贈人不識夜夜
居匣中精光耀白日所以千里驥長鳴徒奮臆

溫風煽熙陽皜皜臨赤宇河漢清以垂繁星在高樹踟
躕步中庭熠燿飛螢度憂懷結不舒脈脈向誰訴達哉
柱下史超曠誰與悟

西鄰妖豔女嫁與東家郎婉孌絕代姿肌體柔芬芳
翠雜裳衣珊瑚搖明璫幼讀行露詩操節嚴冰霜十三
不出戶二十守閨房義比秋胡妻羅敷亦同行自從嫁
夫君薄倖良可傷同心內自乖終風暴且狂朝隨遊獵
騎暮宿青樓倡不念兔絲情棄擲委道傍終宵守空帷
淒然獨旁皇身如斷蓬根泪如迴三江一心抱貞堅德
音胡無良所恨不識察豈徒惜容光羨彼雙飛燕差池
其徇翔

少年快意時容華若朝暉愁樂遞更變流光忽西頽
鏡時自照白髮行相催朝如桃李華暮同秋草萎榮名
等飄風光景隙駒馳丹砂駐朱顏仙人難可期

禮一

五

古昔明達者東都兩疏氏拂袖還林中盛滿自知止飲
餞傾朝臣車馬如流水陸生服南越歸來家好時橐中
千黃金慷慨散諸子挂劍日嬉遊歌舞動閭里朝曦無
迴御江水不返流絲斷難再聯落葉豈更收世人好夜
行鐘鳴良不休損益悟聖言知己企前脩

秣馬將焉之駕言弱水旁雲陰結重樓臺殿鬱相望冉
冉列仙人飄飄襲霞裳兩兩吹玉笙離離鳴鳳凰我欲
往卽之波濤浩茫茫身無雙飛翼悽愴結中腸

沈憂不可解終夜涕交頤朝步出廣野展轉臨前坻南
陔高山巔峻嶺俱列施陰霾噎以繁和御慘無暉虎狼
據我側驚風飄我衣我欲策駿足荆榛道嶮崎我欲寫

憂煩徒侶無因依回首望高堂置酒日嬉嬉居夷豈識險樂致令心悲古人有遺言在安不忘危

種蘭深谷中寂寂吐幽芳桃李下成蹊明珠生夜光達人不求名立身苦不臧我聞接輿言迷陽故無傷

高臺多悲風深抵多秋草男子志不伸咄咄繁懷抱盛年不可留誰能常壽考尚平遊名山婚嫁苦不早我思採紫芝逍遙以終老

蟬噪高樹枝蟋蟀鳴窮砌明月入我幃反側永不寐良時不生憂憂來與時會蠶老爲抽絲心傷以憂瘁寶刀絲可截憂去仍復至人生無百年忽忽信若寄徒爲苦役役胡不恆晦晦文侯悟至言魏國信我累我慕漢陰

禮一

六

夷灌園謝機械

明妃生漢宮自負傾城質眾人舉飾貌黃金買顏色可憐絕代妍君王未曾識一朝賜單于相見始驚惜紅顏不自矜詎望承恩澤吁嗟海姪女紅妝倚門立

白日歸虞淵忽墮西山嶺所嗤夸父愚窮足躡飛景前途慮轉逼無涯詎云騁北邙何纍纍白楊何蕭蕭彭殤總同歸千載猶昏朝狂夫昧委化智慮終徒勞

夏日溫允文見過適久旱甘雨驟降用以述懷

祝融令始布屏翳澤未敷九旬憂愀焚下土乃焦枯忽枉故人駕惠言顧我廬三載愴離別千里斷音書適見情用愜相對焚枯魚執手問顏色悲我方茹荼立言既

以暢素襟悠然舒狂風西北來重雲羃庭除震霖徧廣野依微霑平蕪乍傾如歎瀑再注若決渠埃鬱勢初變蘊隆困斯蘇既慶起田稼亦欣滋圃蔬涼色緣隙度清音透樞虛明發轉無寐立談共踟躕

湖中夜泊效謝體

落日沈遠樹寒煙出孤城湖中鷗鷺起沙際蟋蟀鳴社鼓發初響漁燈漾微明遙岑漸以沒但聞疎鐘清空水饒雨色雲林散秋聲未深宋玉悲良懷遠公盟獨步縱遐矚曠焉寄微情

冬夜簡寄舅氏康伯

慘氣變百卉流光鑒空幃遙林長風勁木末嚴霜飛踟

禮一

七

踟悲往路悽惻懷所依聊將疎麻贈代以奉音微

贈虛肩道人

人生如六馬並首受銜縶躑躅蒙塵途朝燕暮復越解鞅謝羈馭之子自超潔既絕愁障牽亦知愛根滅清虛禮王宸立同悟眞訣杳杳凌紫氛峩峩近銀闕乾坤悠浮沈滄海容變沒精炁還太空騰輪縱飄忽問君亦有肩杖頭擔日月

題春山書屋卷

冥心棲高深小搏托巖穴日照羣鳥喧雲麗眾芳發湍鳴激清池竅動盪疎樾既資窮索幽轉覺紛紜絕含綵闕朝霞飛翰映孤月芝英聊以飡蘭佩永宜結爲歌泌

水章獨探鴻寶訣千秋馳素懷尙友企貞哲

代愛姬贈主人

灼灼桃李花遲遲春日陰嬌花見妾貌白日況君心歸
黃誠亦誦敝席時所欽背立頻偷顧含情黯獨吟願貞
歲寒意持此保恩深

看美人摘薔薇

繡襪迴鮮露羅裙承曉風含羞復含態傍架更移櫳探
疎終或謝愛近意嫌豐腕玉防臂刺髮雲懼礙叢攜將
簪寶髻的的兩疑同

名士悅傾城

玉鞍游俠客金屏佳麗人目成雙意結神洽寸心陳龍

禮一

八

鴛疑江浦鴻驚是洛濱舞態飄迴雪歌響動梁塵結緣
知難貴明珠詎可珍未投芍藥贈遙見桃花春

鬪雞篇

蒼隼誠雄擊迴鸞亦善翔詎如張錦翼奮勇登華堂長
鳴懷獨逞赴敵誓無當芥羽散飛彩金距曜嚴霜英名
稱漢帝麗藻逞陳王願比干城武畢命向邊場

白嶽詩爲周生賦

周善琴

震旦啟玄宮巋巖表靈異橫空千餘仞飛霞散彩翠半
壁開天門谿衍列星墜覽勝懷名都金光此焉闕以爾
高深情微悰寄幽邃獨抱嶧陽桐悠然遣塵累一彈白
雲流再彈玄鶴至窮壑飄涼風長松落寒吹兩兩相和

鳴清音動天地何必慕五嶽俯仰恣吾意

感舊篇

平生愛俠游驅馬入皇都燕齊多奇士忼慨氣有餘仗
劍行報仇不惜千金軀破藏繁弱弓腰懸金僕姑左手
臂蒼鷹右手牽韓盧夜歸烹肥羜斗酒相歡呼執別臨
河湄岐路歎踟躕踟躕悲來日青春馳白駒嗟余已二
毛所遇並云祖華屋空塵土墳墓成丘墟俠骨云何葬
言念結交初永昏有再明寒肉無回枯金石虛銷鏢何
況身與膚悵望荒原中流涕長歔歔千載賢達士勗哉
懷令圖

發青陽驛

禮一

九

條風啟征途遄邁自旭日覽古舒遠懷解紱謝微絆廣
衢殘雪開遙甸芳莢散遠楊旣載敷谷禽亦時囀尙遊
達者心點狂聖所贊唐風咏山樞感物有餘歎

題夏日山村圖

朱明變炎景綠條鬱重陰幽厓無烈照空谷生寒音兩
兩村老翁偃息在中林遠洲維釣艇暮出滄浪吟散髮
踞盤石逍遙清塵襟緬懷巢許儔千載同此心

過訪允兆因賦贈三首

桐生高岡巔條幹紛漣漣大枝干青雲小枝拂巖阿蹶
爲三尺琴宮商均諧和千載釜爨下堙沒恆苦多世無
蔡中郎清音當奈何

城南何所有種桑復漚麻桑麻新雨長密葉柔且嘉用力倍苦辛終歲收汗邪紛紛南陌頭羞彼桃李花汎汎谿中蘋離離岸邊茝翳彼藜苳多芳香難掇采有美居深溪零露漙漙霽溪水阻且迂伊人竟安在曉日照芙蓉借以譬文彩孤松挺雪霜歲寒貞不改

送表兄嚴六之南昌從事

廣隰多茂樹汗潦無原泉翮彼鳳皇鳴必于岐岡巖人生貴自立基下每速蹶嗟爾方弱齡嚴君蚤捐棄拮据母氏勞三遷訓以義雖有連理枝中歲多凋瘁君能奮蒿萊身膺一命貴服官有崇卑致身義豈殊勿謂魚目賤含輝比明珠下位洵難處榮辱生須臾三復金人銘

禮一

十一

口乃禍之門老氏貴柔弱剛強寧久存骨肉連離別君以片語猶勝兒女仁執手泣如雨

古意寄贈屠緯真

熒熒圖中葵翩翩幕前燕與子結綢繆疇昔共歡宴落金石心恩愛矢不變好脩眾所譏蕭艾固難辨蛾眉自來妬謠詠更奚怨嫫母本自醜西子本自妍君恩一朝歇美惡同棄捐妾意貞不移君情或能遷清露零蔓草有時還復連君如楊柳花妾如淥水萍花飛著水中何愁不合井

集允兆宅

折草期芬芳何必蕙與蘭娛客貴適意何必盛盤餐深

夜接尊酒中情有餘歡華戶無俗駕幽溪激鳴湍借此清嘯傳杯畔傾如瀾明燭朗夕照涼颺散輕紈白露何瀼瀼繁星在檐端豈其乏豪貴心知良獨難飄飄千仞上相期振高翰

賦得照流看落釵

佳人若耶渡密葉礙新粧試將明鏡裏照取舞鸞翔雲堆分日暈蓮湧蕩波光風搖難遂穩影合易成行還疑洛妃如回頭笑問郎

爲挽船士與新娶妻別

葛藟何縣縣根株交以蔓良夜偕枕衾光輝生燦爛容華及上春行樂方衍衍本意同百年豈期中道散昨日

禮一

十二

雙鴛鴦明朝失羣雁歡燕在須臾揮手腸已斷我行卽長路子居守空帷長路有時盡帷空誰與悲但持寸心在無憂顏色衰

寄馮開之太史

清露被蘭皋金風蕩煩暑永夜懷伊人遙遙隔川澍身本箕穎儔眷此夔龍侶偃仰起命世資實乃斯文主皇皇多士師奕奕明時輔素心契巖穴玄情越圭組瑚璉陳明堂礎礎遺道左所繇形質殊致復音容阻昔別綠蘿蕪今來凋萋楚旣恨違芳菲亦悲變時序折彼芙蓉花因風寄江渚

嚴道澈過訪不值寄懷二首

河漢清皎皎照我彈鳴琴野鳥羣高飛叢薄一何深有
鳥失其侶旁皇向中林寂寂感物候悽惻生悲吟一吟
還一思白露霑我襟絃絕不復調良夜空沈沈抱此孤
桐還藉以寄知音

有樂空在懸有酒空在尊不能娛佳賓何以寫憂煩微
蟲語庭砌涼颺入櫺軒迢迢懷伊人展轉胡能言燕雀
處林莽鳳皇何高鶩豈不願往從所嗟隔山樊不如秋
蓬根隨風向空原

寄京邑同志

凜凜孤根松托生在高丘與子期夙昔恩愛結綢繆兩
心厲白日堅貞同千秋朝趨鳳皇池夕典鸛鵲裘耳熱

禮一

七

仰天嘯春華紛若抽氣吐椒與蘭聯翩建安倚尺蠖伏
泥中紫霄神龍游置身忽以殊寸心獨含愁含愁於遠
望天漢阻河流脈脈懷深情沈溺豈足憂

沈溺豈足憂終夜自反側援琴一再彈高深眇難識我
思古人心曠焉遺世立猿猱狎中林游魚逝深澤雉離
居山原飲啄一何適舉目覽寰中蜉蝣紛以疾東方誠
嫚世金門聊寄跡何如安期生留書謝金壁孤悵誰與
言一言三太息

太息誰與言吾友滯京洛眇若參與商徘徊歎寥廓鵲
鸞集昆明戢羽洵云樂矯彼冥飛鴻高颺避縉微疇昔
念同羣飄零若秋籜栖翔各異路處世在所托乘時揚

令名勗旃勿自薄

送錢惟凝驗封之任留都

涼風吹林杪大江水微波明月將桂棹流光澄絳河握
手傾金壘惜別臨當歌我歌淒以激我酒旨且多龍關
鬱崔嵬珊珊搖鳴珂鯢遊辭尺渟鴻栖羞卑柯疇昔有
奇志春華莫蹉跎

榜人夙昔道駕言臻江干江干何所有芬芳茝與蘭我
欲采佩之隨風汎輕瀾匪余好奇服蕭艾日以繁雄鳩
日鳴逝鷺鳥翔雲端愴然情獨結脂車迅難攀在這分
日親庶幾古人言持此以贈子用舒別離顏

虞山二首

禮一

七

駕發吳城隈言臻琴川路觸炎振短策凌虛縱遐步幽
崖轉盤紆蒼林莽回互翠屏千餘仞虬螭踞踞嵌空
標玲瓏錯采變晨暮巧豈椎鑿功力由神物護窮巖綴
玄珠飛泉歎深樹隨風奏宮商暎日炫丹素疑茲瓊瑤
宮詫彼仙靈住因崇訪道心亦資濟勝具悠然遇安期
逍遙陟玄圃

蘭舟憩層陰荷衣試微涼醺醺蒼靄中窈窕琳宮藏青
天沈巨壑丹霞起層岡峩峩劍門闕磷磷隴坂長磐礴
龍石轉飄飄虬松翔孤雲恣澹蕩大海浩蒼茫振衣舒
歡歌高情曠無方坐看曜靈匿揮戈慕魯陽

送馬苻卿子告還同州

達人尙嘉遜君子貴識微遜氏允善懷觀化以行違富
盈無後履虧旻有前期逐逐同飛蛾滅身眾所嗤眉睫
眇反照躬蹈奚能知夫子韞良璞熒熒明堂資家率萬
石風祖德同韋詩邁跡紹先緒蜚聲縉雲司懋選典三
禮雍肅甘泉祠文物當熙朝象賢協羣推晉秩尙符璽
從容向留畿宏鉅未竟展況當強仕時豈謂不崇朝長
獻謝組圭朝披泰華雲暮采首陽薇蛟龍潛深壑鸞鳳
凌霄飛寧處離落間垂翅受繼羈爲頌蒸民篇明哲侔
芳規

送周石父之永嘉赴高將軍招

短褐辭故廬長揖向幕府朝帆發富春暮宿臨回浦炎

禮一

古

銷塵既清嶺迴路逾阻杖破石門煙衣濕龍湫雨眺覽
入丹青吟嘯靜笳鼓洞天逢容成靈砂共君煮

送韓觀察之任秦中

古人論交道白頭歎如新所貴在知己然諾可許身疇
昔締深好執手臨河潯尊酒慨以懷微衷片言申黃河
天外流滔滔意無垠德立信不孤交合良有神感茲金
石固皓首彌相親隨風各飛揚羞彼陌上塵離合何足
念翹首延平津

天地忽晝冥北風抑何狂吹我五湖水波濤混蒼茫鯨
鯢其張吻毒虺據我傍浮雲黯四陲舉足徒傍皇魑魅
滿路衢何日問豺狼息火明其膏止沸乃揚湯悲哉九

關遠凜哉九秋霜慨此大地中誰爲控懷襄一柱撼百
川獨力排羣猖詩人頌豈弟感歎泣沾裳沾裳一何訴
皎皎白日光願比畏壘民家戶祝庚桑

軒車駕言邁言邁長安路隴水日夜聲秦川莽雲樹離
宮夕照中樓闕紛無數函關天險開河山四塞固慨息
朔方鸞甘泉羽書驚滄中殺氣昏三輔勞委輸轉戰因
孤城神武羣酋仆暴骨遍郊原荒涼悲野戍時艱重老
成聖明屬西顧瘡痍藉撫循德威眾所附勗旃懋勛猷
千秋垂竹素

七夕俞氏山墅宴集有賦

山樓澄夕暉幽壑集秋爽迴湍激堂宇流雲度林莽旣

禮一

古

欣值良辰復茲愜心賞秦謳吐清芬嵇琴發瑤響雙星
耿河津玉露濕仙掌轉覺禽魚親自生濠濮想無文酬
七襄有懷暢孤往

董禮部集卷二

明烏程董嗣成著

同邑後學劉承幹重編

七言古詩

貧交行贈嚴大

結交莫結富豪子黃金散盡情如水結交願結貧賤交
鶉衣短褐意自驕家無擔儲食不給壯氣凜凜摩青霄
憶昔相從總髮時片語相結心相知肝腸歷歷共披示
季布一諾誰能移裂眚怒髮氣未絕刀環已挂人頭血
長空白日忽東流朔風六月吹寒雪無錢不似市兒求
有腰肯向傍人折別來十載君猶貧絺袍猶是舊時人
斗邊誰識豐城氣璞裏空憐楚壁塵黃河雁斷幾秋草
歸來菰蘆春已老多時白眼向人看此夜青尊爲君倒
平生結交二十年意氣那得如君好千金不惜牀頭盡
七尺何須徒自保飲君酒請君聽我擊劍歌紛紛濁世
今如何勢在誰人不膠漆轉眼一去情無多吁嗟轉眼
一去情無多

禮二

嘉業堂校刊

紀子達子脩昆仲夏夜相邀蔡宕玩月醉後放歌
青松軒下微雨收清風六月涼如秋明月斜銜碧雲裏
赤日半落西山頭主人不辭酒百斛清宵擬作乘槎遊
乘槎蕩漿出村口小溪夾道垂楊柳侍兒初返採蓮船
玉腕纖纖進新藕擊楫行歌出畫橋紫簫曲曲度蘭皋
蒹葭風靜湖光白星文不動青天高青天倒映湖光裏

鮫人龍女聲嘈嘈散髮一呼數斗盡河朔空復稱雄豪
千年劉阮已寂寞卽今此業輸吾曹尊中已空不足恣
酣暢又有輕舸送新釀中流宛轉夜未央狂來大嘯踏
高浪相逢總是高陽徒此時不飲何爲乎青春一去不
相待富貴可得常在無浮生碌碌竟何事雙鬢辭我先
凋枯飲君酒爲君壽惟願清風明月對金尊與我相隨
同白首醉眠不知天地復何處但見星辰歷亂在我手

莫憲使姜民部招飲雲龍山漫成短句

黯黯孤城落日懸蒼蒼紫翠亂峰前河流千里瀉秋色
村郭萬家迷遠煙落木蕭森天欲暮片帆高下空中度
霸業縱橫竟若何寒月荒涼臨野戍野戍秋深去馬嘶

禮二

二

殘星歷歷向人低馬蹄星影亂流水鶴去亭空浪傳耳
英雄壯氣已消歇安問當年游俠子

雪中入署示屠緯真

天風夜半吹寒雲片片碎落闌干下手僂膚裂強出門
狂飈飛石亂相打鴉啼盡日冷衙齋窮巷泥深厄羸馬
與君倪首府中趨愧殺當年高卧者

家大人同諸客遊盤山歸道其勝不覺色飛李白

夢遊天姥良有以也遂作是歌

曾聞秦皇鞭石東海東波濤屹立生雄風又聞巨靈夜
劈太華峰黃河一綫流其中生年二十不出戶心隨五
嶽遊空濛家在吳興萬山裏溪山罨畫真不窮天台窮